

VENECIA

Imos comezar a nosa viaxe por Italia cunha cidade única no mundo: VENECIA. A cidade de Venecia está no interior dunha lagoa. Está construída sobre máis de 100 pequenas illas, separadas por 160 canles e unidas por máis de 400 pontes.



Localización de Venecia en Italia

A nosa primeira parada vai ser na praza máis importante de Venecia:

PRAZA DE SAN MARCOS



Sempre foi un lugar moi importante da cidade, xa que nela celebrábanse moitas actividades como mercados, procesións, espectáculos teatrais ou desfiles de entroido.

Na Praza de San Marcos podemos visitar:



Basílica de San Marcos



Campanile de San Marcos

O Campanile é o campanario da Basílica de San Marcos. Con 98,5 metros de altura, é o edificio máis alto da cidade, e ofrece unhas vistas estupendas de Venecia.

A torre orixinal servía como faro para os navegantes ademais de como campanario.

A torre que se observa hoxe é unha reconstrución (a auténtica derrubouse en 1902) aínda que a forma orixinal de 1514 mantívose.



Palacio Ducal e Gran Canal

O Gran Canal é o máis grande e importante de todas as canles de Venecia. Os seus catro quilómetros de lonxitude percorren Venecia dividindo a cidade en dúas partes.


Agora imos admirar dúas das pontes máis famosas desta cidade e coñecer un pouco da súa historia.

Ponte dos Suspiros

Esta ponte foi construída no século XVII, concretamente no ano 1602. É das poucas pontes que ten unha estrutura pechada.

Se vos preguntades por que é tan especial esta ponte, á parte de por a súa beleza e tamaño, teredes que saber que posúe unha curiosa historia .

Segundo conta a lenda, esta ponte unía a antiga prisión co Palacio Ducal, onde os prisioneiros de dita cárcere eran xulgados. Esta ponte era o último traxecto que realizaban todos os prisioneiros antes de entrar na cárcere e , cando pasaban por ela, suspiraban porque era a última vez que vían o mar e a luz do sol durante moito tempo.



Vista dende a ponte dos suspiros



Isto é o que podían ver os presos, a través das dúas ventás da ponte, antes de entrar na cárcere.

Ponte de Rialto

É a ponte máis antiga das que cruzan o Gran Canal.

Foi construída en 1181.

Nas súas orixes era de madeira, sufriu varias catástrofes: foi queimada e derrubada en varias ocasións. A finais do século XV foi construído en pedra.



Medios de transporte máis utilizados

Góndola



As góndolas son unhas embarcacións tradicionais. Están feitas á man con oito tipos diferentes de madeira. Adoitan medir 11 metros de longo e pesan sobre 600 quilos. Unha viaxe turística de 30 minutos adoita custar 80 euros.



Traghetto

Os traghetos son góndolas que se utilizan para cruzar o Gran Canal polos lugares onde non existe ningunha ponte. Son moi cómodos e económicos.

Vaporetto

Os vaporettos teñen a función de “autobuses”. Do mesmo xeito que os taxis, as ambulancias, os coches de policía ou o servizo de correos, os “autobuses” de Venecia tamén son acuáticos.



1. Marca as respostas correctas sobre Venecia:

- ☐ Está dentro dunha lagoa.
- ☐ Está construída sobre máis de 100 illas.
- ☐ A súa praza máis importante é a Praza da Ferrería.
- ☐ O Campanile é o edificio máis alto da cidade.
- ☐ Campanile en italiano significa muíño.
- ☐ A Ponte de Rialto é unha das pontes máis novas da cidade.
- ☐ As góndolas están feitas de madeira.
- ☐ Os vaporettos son os “autobuses” de Venecia.

2 a. Escribe coas túas palabras por que a Ponte dos Suspiros recibe ese nome.

b. A Ponte dos Suspiros ten unha estrutura pechada, por que cres ti que a construíron así?

3. Unha viaxe en góndola durante 30 minutos custa 80 euros. Pareceche unha viaxe cara ou barata? Razona a túa resposta.